

## CASSANDRE

## FRANCOISE.

**F**RANÇOIS, que faites-vous? Où auez vous les yeux? Quel mauuais conseil vous precipite aux malheurs, que pourriez aussi facilement preuoir que moy, bien qu'eprise d'un saint enthousiasme, puis que le passé vous a montré ou deub monstrier, combien vous sont dommageables les alliances estrangeres trop estroictement contractees, & principalement celles d'Espagne? La perte de vos enfans; vos filles forcees; le saccagement de vos villes, les sacrilèges commis en vos saints Temples: bref la ruine entiere de vostre pays vous deuroient esmouuoir, puis qu'en tout cas vostre condition ne peut estre pire, bien que tout l'univers se bandast contre vous, pour de force vous contraindre d'effectuer, ce qu'à vostre malheur & desauantage de vostre Frâce vous auez promis. Je veux que y deussiez succôber, ce ne seroit à vostre deshonneur, puis que les vaincus sont contraints d'accepter telles conditions qu'il plaist aux vainqueurs. Mais vous ne voulez attêdre, vous estes vaincus sans coup ferir, & par crainte de ceux qui ne sçauent que fuir deuant vous, vous accordez ce qu'à peine vaincus on vous eust osé demander? Vous prenez en mariage vne desheritee, pendant le temps seulement qu'elle aura l'honneur d'estre compagne de vostre Roy, & semble par vostre accord que son pere luy donne en mariage le droit qu'il pretend sur vous.

Il n'en sera ainsi, vous vous en deporterez, ressentant ce qu'à peine encores, auéglez que vous estes,

vous ne voulez racognoistre, vous prendrez celle en France, qui seule digne de ce sceptre, semble auoir esté enuoyee de Dieu pour reunir vne branche de-  
faillante à son tige: vous suiurez les cōseils de celuy que vous auez abandonnez au besoin: luy qui vray Decie auoit vouié & destiné sa vie au salut de son pays, lequel, bien qu'il se vist delaisé de vous, a neantmoins persisté en ses bons desseins, & seul a destourné vne fois le cours de vostre destinee, empeschant la perfection de ses alliances: qui seul a tousiours resisté à ses maudites & dangereuses viperes, qui non contentes d'auoir tousiours possédé le cœur de vos Roys, ne taschent qu'à l'accroistre qu'avec la ruine entiere de leur mere.

C'ont esté de tout temps leurs desseins, ç'a esté autrefois le seul motif de leur saincte vnion: & pour cest effect vous ayant rauy (*sous esperance de leur mettre avec l'Espagnole ce noble Sceptre en main*) ces genereux Princes (*qui bien qu'estrangers, mais adoptez par vostre France, ne se sont iamais monstrez autres que bons François qu'en ceste occasion*) vous auoient mis en tel estat, que sans resistance, vaincus par vous mesme, vous fussiez tombez sous la tyrannie de celuy que vous auez tousiours craint, & hay plus que la mort, sans espoir de vous en releuer: si Dieu regardant vostre France d'un œil de pitié, ne vous eust enuoyé ce grand HENRY, qui non pour ambition de se voir vostre Monarque paisible, mais meu d'affection en vostre endroit, aimant mieux s'enfeuelir aux cendres de sa patrie, que la voir reduite à supporter le ioug de son plus grād ennemi: a pris la cuirasse, a quitté le repos, pour avec les armes vous remettre, vous qui tiriez desja à vostre fin. Et par son soin, par les trauaux qui luy a fallu endurer, & a surmonté par la vertu, assistée d'une grace



speciale de Dieu, qui recognoissoit la iustice de ses armes. Il vous a rendu le repos tant desiré, a appaisé les tempestes qui auoient presque perdu vostre nauire. Sa seule memoire vous deueroit maintenant retirer de ces alliances Espagnoles, vous ayant tousiours monstré quelles alliances il falloit contracter, quelle amitié il falloit rechercher des Espagnols, leur tenir le pied sur la gorge, releuer ceux qu'ils auoient atterrez, assister ceux qu'ils vouloiēt estouffer, estre ennemy de leurs amis, & amy de leurs ennemis, punir, quoy que grands personnages, & desquels il semble qu'on ait besoin, ceux qui en quelque façon leur fauorisent en leurs conseils, se laissans emporter à leurs promesses.

Ce sont les alliances qu'il vous a enseigné de contracter avec eux, non rechercher à son mespris & à vostre desauantage, ce qu'il leur auoit (quoy qu'ils l'en sollicitassent) si souuent desnié? Il sçauoit bien que ce qu'ils en faisoient n'estoit que pour s'accommoder au tēps, ayans recogneu les pratiques qu'ils taschent d'auoir en France, & pour ce estant contraint punir celuy qu'il auroit appellé son second en la restauration de son Estat, pour donner crainte aux autres de ne se laisser corrompre & trahir avec eux leur propre patrie. Ce qui eust telle efficace, que les Partisans Espagnols pendant sa vie n'ont osé descouurir les trahisons qu'ils couuoient dans leurs ames, estans contrains (quoy qu'Espagnols) se monstrent bons François.

Mais il est mort, vos meschancetez en sont cause, ie n'en veux dire dauantage, ie suis Prophete ie dois parler de l'aduenir, non du passé: Il est mort, & ceux qu'on pensoit estre deuenus bons François, pour le peu d'effect qu'auoient eu leurs premiers desseins,

quittans l'habit duquel ils s'estoient masquez pendant sa vie, apres sa mort ont fait le plus grād effort, que l'Espagnol (à qui ils n'attendoient que l'occasion pour le recompenser de tant de pistoles qu'ils ont receus de luy pour se corrompre eux mesmes & vos François) eust sceu desirer d'eux, luy donnant maintenant en mariage ceste France toute florissante pour sa longue paix, luy ayant voulu donner autrefois presque ruinee, pour les longues guerres qu'elle auoit enduree: C'est la recompense de sa trop longue attente.

Et encores les estimerez bons François ! zelez à vostre bien ! vous benirez leurs sainctes intentions, eux qui n'ont autre but en leurs conseils qu'à vous ruiner ! Vous vous perdez, croyez moy, & si vous ne le faites vous sentirez bien tost l'eschet qu'a apporté en cest estat la mort d'Henry le Grand. Mais ie vois au cōtraire, vous faites des feux de ioye, vous passez les nuits en ballets & en dances, en esperance de ces pretendus mariages : Hé que pensez vous faire ! accorder deux peuples du tout ennemis ? plustost l'eau & le feu se mesleroyent ensemble, & meslez produiroient leurs effects, que le François peust compastir avec l'Espagnol. Le coq est du tout contraire au lyon, & a sa seule voix luy fait monstrier les talons & rabatre le feul de son courroux.

Mais ie me trompe, ie luy fais trop d'honneur ce n'est point vn lyon, c'est vn renard, qui est tousiours au guet pour attrapper vostre coq : tenez-vous donc sur vos gardes, & ce plustost quand il fera le doux : ses promesses ne sont que des desloyautez ; son visage riant ne cache que courroux ; ce changement qu'il monstre tout à coup est vn indice certain de quelque dangereux dessein. Car qu'à il affaire d'ailliance



si estroites avec vous, sinon que par tels apas il vous croit abuser? Ce n'est en luy que dissimulation, tousiours cōtraire de paroles aux effects, & est plus prest à faire l'un quand il a promis l'autre.

Retirez vous François quand vous pouuez, de peur que ne le pouviez quand vous le voudrez. C'est vn mauuais compagnon qu'un renard, & vous estes trop francs pour l'auoir pour amy.

Et quoy, ne considerez-vous point ses desseins? Non, l'espoir du bien qu'on vous promet qu'il en viendra, vous offusque les yeux & quel bien pensez vous qu'il en doie reussir? Vostre seule ruine, apres le reste de l'Europe, est la fin de ceste alliance, vous receurez de luy le bienfait que Polypheme promettoit à Vlysses, il vous ruinera les derniers, ce sont ses desseins.

La Flandre abandonnee de vous se verra bien tost surmontee.

L'Angleterre la suiura de prest, & sous pretexte d'estre bons Catholiques, vous exterminerez en vostre pays la religion pretendue reformée, renouvelant les guerres qui vous auoient pensé ruiner, vous vous affoiblirez vous-mesmes, vous ruinerez de vos bons compatriotes. C'est ce que demandel'Espagnol pour paruenir a ses desseins, il sçait bien que seuls & quelques-vns d'entre vous sont exempts d'estre suspects de tenir son party, & ne se sont point encores (quoy qu'il l'ait voulu faire) laissez esblouir à l'esclat de son or. Ie ne suis Huguenotte, mais l'experience me le monstre & la verité me contraint de parler ainsi.

L'Italie quand elle vous aura perdu ne resistera plus à ses armes. Il y commence desia, & laschement vous abandonnez vos allies.

L'Empire d'Alemagne se verra bien tost asseruy à ce Renard, qui trompera mesme ses aînez, il restera la conquête d'Orient: Ce sera vostre part, le Pape vous en donnera le droict que vous vous promettez desia; vous promettra des croisades; l'Espagnol se voyant proche du succez de ses desseins vous y assistera; vous ne perdrez l'occasion, & assemblant en vn toutes vos forces vous vous y acheminerez, comme à vne victoire certaine; vous y conduirez vostre Roy pour le voir couronner au siege des Solymans, ou bien tost se trouuera la seul desnudé de tout secours, estant trahy des siens desia corrompus par l'Espagnol & abandonné de ceux qui luy pouissoient, toutes ses forces estant rompuës, il courra quelque bruiet de sa mort, on enterrera vn Suisse en son lieu, à la façon du Roy de Portugal l'Espagnol sur ce bruit (quoy que faux comme beau frere) rejettant vostre loy, la ligue s'emparera de son trofne, personne ne luy pouuant resister: vostre Roy reuient, ce sera vn faux Sebastien: ce sera vn Patissier ou quelque Calabrois, & le mettant en prison on luy fera miserablement finir ses iours.

Mais seroit trop long temps attendre pour vn tyran qui brusle de desir de se voir vostre Monarque, & qui met le but de tous ses desseins en vostre ruine il cherchera quelque plus cour moyen, il sçait que par son alliance vous estes contrainsts de quitter l'amitié de tous ceux qui vous sont de tout temps alliez, il sçait que pour cela ils sont du tout alienez de vous, Que fera-il? Il les sondera, & recognoissant leur mauuaîse volonté en vostre endroit, les sollicitera à s'allier avec luy, il se preuandra du peu de fermeté & constance que vous auez en vos alliances, & pource se les rendra amis, cassera plustot son Inqui-



sition ne se souciant du Pape que pour son bien, mettra liberté de conscience en ses pays, & en vn besoin prendra le turban pour vous ruiner ; par ces moyens les ayans gaignez les bandera contre vous, les portera à se vanger du tort que leur auez fait de les auoir abandonnez les aidera de ses forces, vous ne subsistez point, estans trahis des vostres & delaissez de tous, & alors ce Renard qui qu'estoit il y a long temps ceste proye, vous voyant oppressés d'un costé cherchera quelque pretexte a son ambition, pour acheuer de ruiner & mettre fin à ceste belle Monarchie, conduite à telle periode pour auoir esté trop credulle, pour auoir trop cherché le repos, & n'auoir voulu croire ceux qui ne luy conseilloyent que son bien.

Quoy François ne preuoyez vous point cela? Estes vous si abestis que vous ne vous ressentiez plus des maux qu'il vous a faict? Auez vous desia mis en oubly la tyrannie & l'vsurpation de Nauarre? Ne vous souciez vous plus de vostre Souueraineté de Flandre? de vostre Duché de Milan & Royaume de Naples, qu'il tient à la honte de vos peres, qui y ont tant employé de forces? Ne scauez vous plus les indeuës pratiques qu'il a tousiours sollicité en vostre France? Luy pardonnez vous la corruption de vos genereux Frâçois, qu'il pensoit estre vos seuls Lyons? Mais il se trompoit, la France estant aussi coustumiere iusques icy à engendrer des Lyons que l'Espagne des Cerfs. Estimez vous qu'il ayt si tost changé le naturel de ses peres? Ne voyez vous pas qu'il ruine maintenant vn Prince, sans auoir esgard aux alliances qu'il auoit aussi estroitement contractées que vous, & que s'il trompe les hommes pour Piedmont, tromperoit Dieu pour la France?

Mais ie le vois, vous n'estes plus François, vous n'estes plus libres, vous ne demandez que le repos qui qu'il vous le donne, & ne vous iouciez à quel maistre vous seruiez, vous n'estes plus de ces François, qui ont de tout temps esté estimez pour l'affection qu'ils portoient à leur Roy; qui ont tant de fois respendu leur sang pour maintenir les droicts, fermans les yeux à toutes autres considerations: Non, non, vous ne tenez rien de vos peres, vous estes Argyranthropes, soldats d'Eumenes, vous trahiriez vostre Prince pour vostre profit particulier, & en cela ie recognois que vous estes au declin de vostre Empire; il faut qu'elle perisse, ceste Monarchie, personne n'y peut, ou n'y veut donner remede, ceux qui le conseillent sont blasmez, ceux qui y taschent sont estimez criminels de leze Majesté, ceux qui en parlent sont perturbateurs de l'Estat: vous estes donc venus à vostre fin, puis qu'on n'y ose donner remede; tout s'y accorde, ie ne voy rien qui y repugne.

On auoit conuocqué les Estats genereaux, remede à la verité fort certain pour reestabli vn Estat, si leur Conseil eust esté libre, & n'eussent eus crainte d'outre passer ce que le plus fort leur demandoit, & ceux à qui deuant que pouuoir estre esleuz, il auoient vendus & promis leurs voix, n'osans proposer que ce qu'il leur auoit esté par eux commandé autresfois, il vous ont reestabli. Mais ce sont eux maintenant qui les premiers ont tracé le chemin à vostre ruine: le Clergé, vous ayant fourny de beaux pretexts pour mettre à couuert les assassins de vos roys mais ie me trompe; ce ne sera plus contre vos Princes legitimes: ce sera contre quelques tyranneaux vsurpateurs de vostre Empire. ouïy ce sera contr'eux



vos Roys deffailant bien tost, si selon leur proposition vous vous rendrez esclau de l'Italien que vous auez tousiours esprouué variable, qui n'est amy que pour le bien, ou le mal qu'on luy peut faire: & ne se soucie plus de vous, voyez le: vous qui luy auez donné son premier patrimoine: mais il ne faut tenir ce discours: tous les Empires du monde, ayant esté en leur disposition depuis S. Pierre, eux qui estoient quelquesfois bien aise de trouuer leur estenduë de terre pour euitier la furie des Empereurs. l'honore le S. Siege en toute spiritualité, mais il s'en fait trop accroire au temporel. Quoy? approuuer ne tenir vostre Estat que de luy, vous n'estes point asseurez d'auoir tousiours vn Paul: il faut craindre vn Boniface, vn Sixte, ou autres, ausquels il ne faudroit qu'une boutade, se voyant se pouuoir en main, si vous leur desplaisez en quelque chose: Si l'Espagnol leur cōmandoit, il vous confisqueroit vostre Empire, comme fauteurs de l'herésie, ils luy donneroient pour butin en cela qui y pretendra plus de droit qu'un autre estant vostre Beau-frere, & par la Bulle casseroiēt plustost vostre Loy Salique, comme inegale & inhumaine, il seroit aussi le plus fort, ayant corrompu & corrompans tous les iours les plus grands de vostre Estat, mesme la plus part de vos François variables & inconstans, qui n'ont pour estre que le changement, ne demanderoient autre chose: & se voyant absouz de la crainte qui leur reste, d'outre-passer la foy qu'ils doiuent à leur Roy, donneroient pour pretexte à leur desloyauté de ne vouloir encourir la rigueur du foudre d'Italie.

Vous y commencez, François, & tous les iours, quelques vns d'entre vous, poussez de ses raisons diaboliques (comme confirmées par la voix de tout peuple, pour le peu de resistance qu'on y fait, & le

tacite & muet consentement qu'on y preste, pour le peu de recherche qu'on a fait des auteurs execrables des parricides des Henrys, s'osent attaquer à la sacrée personne de vostre Roy, exempt pour son bas aage de commettre ce pour quoy selon eux, il seroit permis de le tuer, si ce n'est que la Couronne seule leur face entreprendre ses desseins.

Vous en verrez bien d'autres, si en reiettant ces maudites propositions du Clergé, vous n'en punissez les auteurs qui vous ont ozé menacer de la mort de cent mille hommes, & de la ruine de vostre Estat si vous ne les ratifiez, mais excusez les, ils ont combattu pour leurs droicts, ayant esté par bulle expresse du Pape, naturalisez Italiens en esperance de pouuoir vn iour participer à la Chaise de S. Pierre.

Et crois aussi que vostre Noblesse pour mesme fin à intention de prendre vn iour le chapeau rouge, & de vray elle l'a bien merité, & l'aura, ayant avec tant de passion moyennant aussi des pensions, soubstenus les droicts Papistres pour diminuer ceux de leur Roy.

En quoy vous voyez pauvres, François, combien vous estes delaissez, puisque ceste Noblesse tant esloignée de l'affection naturelle de leurs peres au seruice du Roy & de leur pays, bastarde, il le faut, de ces genereux François, qui ont autre-fois trouble toute l'Italie pour l'en deraciner: s'est rendu faulxice d'une si dānable maxime, seule capable de bouleuerfer l'Empire le mieux estably qui soit au monde, & m'estonne comme elle a peu trouuer lieu dans l'ame de ceste Noblesse, qui pour ceste cause à quitté le surnom qu'elle auoit obtenu par tant de victoires, & pour s'estre tousiours monstree affectionnee à maintenir les droicts legitimes de son Roy: ella la ceddé, ce beau nom de conseruateur de l'Estat, encores à ceux dé qui elle n'auoit auparauant iamais



tenu compte audit tiers Estat, lequel s'estant mon-  
stré vraiment Noble & seul digne, pour ce temps,  
du nom François s'est roidy, assisté de vostre premier  
Prince, & de vostre Cour de Parlement, qui y con-  
tinuent encores tous les iours à maintenir les droits  
de sa Majesté, pensans soustenir en cecy quelque peu  
ce grand edifice, & n'estant toutefois allez forts, ont  
succombé, afin que le cours de vostre destinee ne  
fust empesché.

Car il faut qu'il perisse cest Estat, il a trop long  
temps duré, & sera en ce temps plustost qu'en nul  
autre: puis que uous ne tenés que du Pape, lequel  
desia tous les ans en sa bulle, *In Cœna Domini*, ex com-  
munic uos Roys, comme fauteurs de l'heresie.

Vostre fin est donc venuë, la Prophetie de S. Remy  
s'y accorde, tant que vos enfans rendront la iustice,  
(ce dit-il) vostre royaume florira: & en quel temps  
la iustice a elle esté moins rendue qu'en cestuy-cy?  
tout est plein d'iniustice, brigues, monopoles & cor-  
rupsions. Ceste belle Astree Françoisse est toute chā-  
gee. Elle a quitté son bandeau, elle voit clair, elle a  
retenu l'espee pour punir les pauures qui n'ont peu  
par leur argent, s'exempter des peines deues à leurs  
crimes; elle retient la balance, non pour peser les  
raisons de l'une & l'autre partie, mais pour sçauoir  
par le poix qui plus luy donne; elle n'est plus vestue  
de rouge, sa robe est bigarree de Cameleon pour  
pouvoir receuoir les couleurs que sa passion luy de-  
mande; ce n'est plus elle qui preside, l'auarice s'est  
emparee de son siage, l'ambition & la luxure domine  
le Cœur de ses Pontifes, ils n'ont rien de reiglé, tout  
y est en desordre selon leurs appetits: Tous particu-  
liers, personne publique, si ce n'est vostre Cour des  
Pairs, qui assistee d'un Theopompe, qui a tousiours  
cherché les moyens de vous remettre sans craintes

d'encourir la haine de ceux qui pour maintenāt tiennent vostre timon & seuls sont cause de vostre mal, taschent par ses iustes remonstrances, ne pouuant autre chose, d'exterminer les abus qui se commettēt au conseil de vostre roy, & monstre par perseuerance en ce dessein, que non point la Pollette, mais la preignante douleur qu'elle ressent d'un si grand desordre l'a poullé à s'assembler tant de fois n'ayant desisté, bien qu'on luy promist la continuation de ce pourquoy on croyoit qu'elle s'assemblast.

Ce petit nombre François, seul desireux de vostre bien, vous doit monstre en quel estat est vostre France, puis que la Prophetie de vostre ruyne estant venue, ce seul Parlement ne la pouuant empescher pour en faire plustot arriuer les effects, vous contractez, non sans honte de desroger à vos peres, avec le plus cruel ennemy qu'ils ayent iamais eu, & non contens de ce pour plustot vous ruyner, vous vous rendez fief de l'Italien, esclau de l'Espagnol qui par droict de felonnie depossedera bien tost vos Roys, pour vous acquerir à son maistre.

Vous perirez donc, toutes choses vous le predident, si vous ne me croyez, qui Prophete enuoyé de Dieu, vous annonce la ruyne de vostre estat, si vous ne vous conuertissez, si vous ne coupez le chemin aux malheurs qui vous tallont de si pres, que si vous ny mettez bien tost la main, il vous sera à la fin impossible d'y remedier.

Vous estes dites vous prest d'y resister, & plustost vous enseuelir dans les cendres de vostre pays, mais vous demandez vn chef: entreprenez seulement & ne suivez en cecy que celui qui s'y est offert y a si long temps, qui bien que ieune d'ans monstre plus de maturité en ses conseil, que ceux à qui en le laissant, vous avez iusques à present voulu croire.



Vous ne mettromperez pas Prince de Bourbon, mais ie desire aussi de vous que ne vous en departiez à la premiere resistance qu'on fera : ce seroit peu de l'auoir entrepris, si vous ne le mettiez à effect, vous vous deuiez proposer dès le cōmencemēt d'y auoir pour ennemis les plus grands de cest Estat : & quoy, pour crainte des traux qu'il y conuient endurer, quiteriez vous vostre patrie en vn si grand besoin ? qui ne vous demande que ce que legitimement vous luy deuez ; si vous voulez estre tel que vostre qualité porte, elle est deliberee de faire & souffrir toutes choses, pour le seruice du Roy & de vous ne reculez donc point, mais assistant vostre ieune Hercules Gaulois, seruez-luy de Thesee, pour destourner les malheurs de toutes mes predicions qui sont certaines, si l'on n'y remedie, aydez-le & il interposera son autorité à vos conseils. Quand à vous, Sire, vostre bas aage ne vous peut seruir d'excuse, pour ne supporter tous les traux qui se presentent, ayant mesmes vn Thesee pour second : vous estes fils d'un Iupiter, qui en pareil aage commandoit aux armées : Vous tenez le Sceptre des Francois, qui n'ont accoustumé d'obeyr qu'à ceux qui par leur vertu scauent commander, & encores en ce temps qu'ils ne tiennent pour maîtres, que ceux qu'ils craignent ou qui leur font bien ; qu'ils sont si chatouilleux en leurs opinions qu'ils tornent incontinent au mal ce qu'ils deueroiēt prēdre a bien ; ne voyez-vous pas que de leur langue enuenimee, ils s'osent attaquer à vostre Maiesté, voulant des son commencement ternir vostre grādeur : prenez y garde, vostre France mesme vous est vne marastre, qui vous enuoye des vostre enfance des serpens lesquels si vous n'estouffez bien tost, monstrant que vous estes vn S. Louys, non vn Charles le simple, pourroient tellement infecter vostre nom de leur venin qu'il vous seroit à la fin impossible d'y remedier : monstrez vous vn Hercules des vostre bas aage, pour pou-

voir supporter les trauaux que ceste Martastre vous met  
deuant les yeux, vous auez trouué vne Pallas ce sage Par  
lement, pour conseil, & vn Thesee pour second, il vous  
seront faciles.

Vous y trouuerez en teste vn Cerbere, les 3. Estats de  
ce royaume qui n'ont eu autre but en leurs propositiōs  
qu'à vous ruyner; qu'à vous rendre tributaire des hom-  
mes, vous qui ne tenez que de Dieu, & qui sera si vous  
ny prenez garde, la premiere cause de vostre mal. Luy  
qui deuoit estre, s'il eust bien fait, les establissemens de  
vostre Estat, qui s'est osé attaquer à celuy lequel apres  
vostre Sacree personne & de Monsieur vostre frere, a le  
plus d'intrest a la cōseruation de cet Estat. Ne l'a-il pas  
mesprisé de ses cris impudens pour auoir voulu souste-  
nir vos droits? N'a-il pas tasché de le rédre criminel en v.  
endroit? N'a-il pas en vostre presence de ses trois diuer-  
ses testes vommy contre luy vn venin tout different? mais  
vous l'aurez bien tost ramené à la raison, continuant l'a-  
mitié que vous monstrez luy porter, & l'honneur que  
luy faites de le desirer tousiours au pres de vous, pour le  
suiure en ses Conseils, d'autant meilleurs que celuy des  
autres, qu'il y a plus d'intrest.

Vous y aurez à cōbattre des oyseaux stymphalides, qui  
enuieux & estrangers empeschent que les François ne  
se ressentent des rayons de vos liberalitez.

Vous y aurez a punir des Dromedes, qui ayant mis  
tout leur Patrimoine en la tyrannie affectee de leurs of-  
fices, succent tout le sang du pauvre peuple, qui abusé  
court à eux comme à leur refuge, pour en entretenir  
leurs cheuaux & carrosses.

Il suiura vn Euristhe, qui na seruy que d'instrument à  
Iunon pour vous perdre, & Thesee qui doit par vne pu-  
nition exemplaire, pour auoir par ses conseils presque  
renuersé vostre Estat, monstrier le chemin a beaucoup  
d'autres, il vous sera facile de le conduire a telle fin tout



honteux de se voir frustré de l'heureux succez, qu'il es-  
peroit en ses desseins: poursuiuez-le, vostre Parlement  
vous y appelle, le peuple, las des pilleries qu'il a exercé  
sur luy, vous y conuie.

Ayant ainsi avec l'assistance de vostre Thesee terracé  
tous ces monstres, qui de diuerfes natures, couuent  
dans leurs corps François vne ame Espagnole; qui ne  
sont nez qua vostre ruine; qui creatures de l'Estranger,  
ne vous pousse qua ce qui leur profite; vous aurez bien  
tost rangé celuy qui ne se fie en ses desseins, qu'à leur  
corruption, ce Lyon rougissant qui ne tasche qu'à vous  
nuire, qu'à vous deuorer vos François, & par son or leur  
oster le reste de l'affection qu'ils vous peuuent porter,  
qui ayant mesme vne Hydre en France, a fait que par les  
conseils de ceux qu'elle auoit enuenimé, vous auez con-  
tracté avec luy des alliances en ce encores plus dange-  
reuses que maintenant pour vous tromper, il quitte sa  
peau de Lyon pour prendre celle d'un Renard.

Ne vous fiez point, mon Roy, en ses promesses, quit-  
tez son amitié, soyez son ennemy, luy qui a voulu il n'y  
a pas long temps deposséder le feu Roy vostre pere du  
sceptre que vous tenez à present: craignez l'effect en  
vostre endroit.

Et pour-ce reiettez au plustost ceste Dejanire, qui ia-  
louse de vostre bien, vous donnera vn iour si vous la re-  
tenez, vne chemise infectée de son venin d'Espagne, qui  
sterille, comme c'est leur coustume, fera faillir vostre ra-  
ce en vous mesmes.

N'allez cercher en pays estrange vne femme, vous a-  
uez en France vne Hebé qui vous attend, c'est elle seule  
qui doit estre & sera vostre compagne, qui vous rendra  
immortel par la posterité qu'elle vous engendrera, la-  
quelle bien que vostre paréte vous pouuez espouser sans  
aucune dispence. C'est elle de qui les peres vrais enfans  
de Bourbon, n'ont iamais euz autre but que le bien de la

Couronne, qui seule vniue delaissee par l'vne de vos branches, peut apres vos longs trauaux vous faire cueillir les pommes Hesperides.

Croyez moy, Cassandre, qui ne sçait que c'est que mēsonge, vous le dit qui vous predits la rayne entiere de V. Estat, la perte de v. Couronne, si vous persistez en ses alliances encommencees, qui sont la fin & le commencement des malheurs qui penchent sur V. teste, & au contraire, qui ne nous promets que bon heur, que victoires, que triumphes, bref, tout ce qu'un Roy biē aymé de son peuple, & qui est prompt a executer ce que Dieu luy commande, peut iustemēt desirer, si vous recepuez pour compagne de V. Sceptre, celle qui dediee à feu Monsieur V. frere apres sa mort, n'est demouree que pour se voir vn iour vostre espouse legitime: qui par ses yeux brillans, & son visage plus parfaict que celui d'une Deesse; qui par sa douce & agreable parole, surpasse de beaucoup celle des Nymphes, vous deueroit si vous n'estes autre que les dieux mēme attirer à elle: qui de surplus vous aporte en la prenāt à femme plus de domaines qu'Esträge, telle qu'elle soit maintenāt au monde vous pourroit donner.

Et encores vouloir prendre vne Maure desheritee & sans bien la quittant là: Elle qui avec sa beauté vous rendra possesseur legitime du patrimoine de vos ayeuls, Messeigneurs de Bourbon & du pays dont vous portez le nom.

Ne pensez point en auoir d'autre avec la volonté de ce grand Dieu qui vous commande par ma bouche de la choisir seule entre toutes si vous ne voulez endurer toutes les punitions que Princes refractaires de ses commandemens sçauroit craindre.

F I N: